

ETAren etenaldiaren
amaiera

«Gerra politika aldatzeko» borondaterik ez izatea egotzi dio ETAk Gobernuari

Astebeteko etenaldia amaitu egin dela berretsi du agiri labur baten bidez

ETAk baloratu egin ditu bere eskaerari emandako erantzunak. ETAren ustez, Gobernuak muzin egin dio erantzun argirik emateari eta «orain arteko gerra politika errotik aldatzeko borondaterik ez duela agertu du». Itunaren agiria «politika horren adierazgarritzat» jo du.

Erredakzioa / Donostia

EKINTZA armatuen astebeteko etenaldiaren epearen amaierarekin batera, ETAk agiri labur bat helarazi zion Egin egunkariari bere deialdiari emandako erantzunak baloratzeko. ETAk berretsi egiten du bere agirian ekainaren 30eko gauerdian «ekintza armatuen etenaldia» amaitu dela eta jakinarazi du «talde operatiboak horren jakinaren gainean» daudela.

Espainiako Gobernuaren jarrrerari buruz, «erantzun argirik emateari muzin» egin diola nabarmendu du ETAk agirian. Horrez gain, orain arteko gerra politika errotik aldatzeko ez duela borondaterik agertu uste du ETAk. «Ajuria Eneko Mahai delegatuaren deklarazioa da gerra politika horren adierazgarri nabarmena», gaineratu du ETAk.

Ekainaren 23an, etenaldiaren iragarpenarekin batera, ETAk dei egin zion Gobernuari Alternatiba demokratikoa-ri erantzun ziezaien. Gobernuak hasieran «tranpatzat» hartu zuen ETAren agiria eta gero Itunarenari sustengua adierazi zion. Itunak baldintza jarri zizkion elkarrizketari.



Joan den asteko asteartean bildu zen Ajuria Eneko Mahaia eta agiri bat plazaratu zuen.

OLALDE

ETAren mezua

Ekintza armatuen etenaldia amaitu dela berrestearrekin batera honako mezua zabaldu zuen ETAk atzo Egin-en bidez (jatorriz euskaraz):

«Mezu honen bidez Euskadi Ta Askatasunak honakook jakinarazi nahi ditu:

- 1.- Iragan berri den asteko deklarazio anitzen oharpenak hartuak dituela.
- 2.- Horien arabera, Gobernu espainiarrak berriro ere erantzun argirik emateari muzin egin eta orain arteko gerra politika errotik aldatzeko borondaterik ez duela agertu du. Ajuria Eneko mahai delegatuaren deklarazioa da gerla politika horren adierazgarri nabarmenena.

- ♦ 3.- Hala ere, Euskadi Ta Askatasunak, beti bezala,

agerpen eta ekimen zehatzen arabera egungo gatazkari irtenbide zuzen eta demokratikoa emateko ahaleginetan segiko du etsi gabe: ekainaren 24a baino lehen bezain luze eta zabal dago gure eskua zintzoki hartu eta sendo estutu nahi duenarentzat. 4.- Nabarmen agertu dela ere euskal gizartearen gehiengoak nahi duela bakea, baina ez edonolokoa, justizia, eskubide eta demokrazian oinarritutakoa baizik. Zentzu horretan euskal gizarteari eta antolakunde desberdinei dei egiten diegu 1995eko apirilko Alternatiba Demokratikoa aztertu eta bere egin dezaten, horren alde lan eginez, Estatu espainiarraren inposizioa altxarazteko. 5.- Azkenik, mezu honen bidez, Euskadi Ta Askatasunak ekainaren 30eko gauerdian ekintza armatuen etenaldia amaitzen dela berretsi nahi du; bere talde operatiboak horren jakinaren gainean egonik». X

Espainiako Gobernuak Ortega Lararen askatasuna negoziatu beharko lukeela esan du Jesus Egigurenek

«Tarte handia dauka horretarako, eta iritzi publikoa distentsio keinuen aldekoa da»

Vasco Press / Donostia

«KONTSENTSU politiko berri bat negoziatzeko prest bagaude, ez dakit zergatik ez duen Gobernuak Ortega Lararen askatasuna negoziatu behar», adierazi du Jesus Egiguren PSE-EEko Gipuzkoako idazkari nagusiak. ETAk enpresari bat bahitzen duenean mundu guztia «mugitzen» dela eta horregatik inor ez dela asal datzen esan zuen atzo Egigurenek. «Gobernuak jarduteko tarte handia duen une honetan, iritzi publikoa distentsiorako keinuen aldekoa den honetan, ez dut uste Estatua hautsiko litzatekeenik Gobernuak Ortega Lararen askatasuna negoziatzen saiatuko

balitz. Gobernuak arrazoi ugari ditu hori egiteko, tartean humanitarioak». Jose Antonio Ortega Lara Espainiako espetxe funtzionarioak 168 egun daramatza ETAk bahituta.

Negoziaketa horrek ez du zaila izan behar Egigurenek Vasco Press agentziari adierazi dioenez: «Gobernuak badaki, edo jakin behar luke, zeintzuk diren bahiketa honetan ETAren solaskideak eta zer egin behar lukeen. Egun dagoen giro sozialarekin, munduko edozein gobernu saiatuko litzateke zerbait egiten. Garraintzi handiagokoak diren gauzak negoziatzeko prest baldin bagaude, honetarako ere egon behar luke». Bere ustez, Ortega

Lararena da «gertuen eta seguru» dagoen negoziazioa, «besteak ez baitirudi posible izango dela». Euskal presoek gaia gauzak konpontzen hasteko «gakoa» dela iruditzen zaio Egigureni.

ETAren ekintzen astebeteko etenaldia dela-eta, «zerbait aterako zen esperantza» zuela adierazi zuen Egigurenek, eta baztertu egin zuen ETAren propagandako ekintza bat izan dela. «Ajuria Eneko Ituna itzali nahi zuela dioten tesiak ere ez nau konbentzitzen, bilera horiek ez zaizkielako axola. Joan den asteko agiriak zerbait esan nahi zuen. Konponbide negoziatuaren aukera tarteka esku artean dutela erakutsi du horrek». X

UGT, CCOO eta CSIF kezkatuta daude Ortega Lararen etorkizunagatik

■ Mobilizazioak iragarri dituzte espetxe funtzionarioa aske izan arte

Agentziak / Bilbo

CCOO, CSIF eta UGTk Estatuaren Administrazioan ditzuten ordezkariek kezkatuta agertu dira Jose Antonio Ortega Lararen etorkizunagatik. Bilbon atzo eskaintako prentsaurrekoan, hiru sindikatuek ez zuten baloraziorik egin nahi izan ETAk su-etena amaitzeko egindako iragarpenaz, beren helburu eta lotura nagusia «beren lankidea berehala eta baldintzarik gabek» aske uztea delako.

UGTko Roberto Burgoaren iritziz, bahiketa honetan ez da aski aztertu ETAk espetxe funtzionario baten bidez Estatuari txantajea egin nahi diola. UGTko ordezkariek azaldu zuen funtzionarioak espetxe politikaren menpe daudela eta «arlo honetan Gobernuak erabakitzen duenaren egile hutsak» direla. Beronen iritziz, Ortega Lararen etorkizuna eta beste edozein espetxe funtzionarioaren etorkizuna jokoan dago «ETAk alderdi politikoek irekitako atea itxi nahi duen giro batean».

Sindikatu hauek bat datoz Ajuria Eneko Itunak iragan asteartean izan zuen jarrerarekin, eta, oster, gaitzetsi egin dute ELAk eta LABek duten ekimen bateratua. Hiru sindikatuek gaitzetsi egin dute iragan astean argitara emandako agirian ez aipatzea «langile bahitu baten defentsa». Burgoaren iritziz, ELAK jarrera «anbigua» izan zuen Ortega Lararen bahiketaren hasieran, eta gero aldentu egin zen funtzionario horren askatasuna eskatzeko mobilizazioetatik.

Dena den, CCOO, UGT eta CSIF sindikatuek atea zabalik utzi zioten ELAri beraiek egindako deialdietan parte har dezan. X



DEBA-GARAIA

Baseriko produktuak transformatzeko zentro bat aurrera eramateko gerente bat behar da.

Bete beharreko baldintzak:

- Titulazio maila: Erdi mailako Teknikaria.
- Deba Garaian errolatua egotea.
- Nekazaritza arloan esperientzia izatea.

Kurrikuluma aurkezteko epea: uztailak 8.

Helbidea: DEBA GARAIA, Urteaga kalea, 23, 20570 BERGARA (Gipuzkoa)